



14. august 2009

EM 2009/29

Inatsisartut suleriaasianni § 32 naapertorlugu matumuuna aalangiiffigisassatut siunnersuummik imaattumik saqqummiussissaanga:

**Inatsisartut inatsisaannik nr. 9 31. oktober 1996-imeersoq kingusinnerusukkullu allannguutitalik Inatsisartunut qinersinernermi allanngortitsinissamik Naalakkersuisunut suliasannngortikkumallugu Inatsisartut aaliangiiffigisassaattut siunnersuut, UKA2010 qaangertinnagu Kalaallit Nunaanni Inatsisartut ilaasortaasa 25-inngortinneqarnissaannut.**  
(Demokraatit Inatsisartunut ilaasortaataat)

### **Tunngavilersuut**

Kalaallit Nunaanni inuttussuseq aallaavigalugu annertuallaarsorinarpoq Inatsisartunut ilaasortat 31-iunerat. Taamaattumik Demokraatit isumaqarput Inatsisartunut qinersinerup tullia nallertinnagu ilaasortat 25-inut apparneqartariaqartut.

Inatsisartunut ilaasortat ikilisinneqarnerat arlalinnik ajunngitsortaqaassaaq. Siullertut aningaasarpassuarnik millionilikkaanik sipaartoqarsinnaavoq, akissarsianut angalanermullu atorneqartartunut (ilanngussaq takuuk).

Aappaattut ukiumoortumik partiinut aningaasatigut tapiissutigineqartartut partiit Inatsisartunut ilaasortaataasa amerlassusaat aallaavigalugit naatsorsorneqartarput. Inatsisartunut ilaasortat ikilisinnerisigut partiinut tapiissutigineqartartut annikillisinneqassapput.

Pingajuattut ilaasortat ikilisinneqarnerisa Inatsisartut ataatsimiittarfiata ilaneqarnissaanut pilersaarutaagaluortoq pisariaqarunnaartissavaa. Tamannattaq sipaarutaangaatsiartussaassaaq.

Upernaarmanna qineqqusaarnermi partiit tamarmik isumaqatigiissutigisupilussuuat ajunnginnerusumik atugaqalernissap sulissutigineqarnissaa. Partiillu aamma isumaqatigiissutigisupilussuullugu akileraarutit qaffanneqannginnissaat. Tamanna isumaqarpoq atugarissaarnerulernissamat suliniutissat aningaasalersorneqarnissaat massakkut aningaasartuutissat pilersaarutaasuninngaanniit sipaarfissanik nassaarnikkut matussuserneqartariaqartut. Demokraatit isumaqarput pissusissamisoortoq politiikerit siullinneqassappata, taamaattumillu pissusissamisuuginnartutut isikkoqarpoq Inatsisartunut ilaasortat ikilisinneqarnissaat, tamanna ukiumut aningaasarpassuarnik millionilikkaanik sipaarfiusartussaammat.

Inatsisartut ilaasortaannik ikilisitsinerup aamma partiit tamaasa eqqarsarluaqqaartittalissavai qinersinerni kikkut qinigassannngortinneqassanersut, tassami qinikkat annertunerusumik suliasaqartarnissaat naatsorsuutigineqartussaassammat.

Taamatut oqaaseqarlunga akissutisinissara partiinillu allanit ilanngussisoqarnissaa qilanaarivara.

EM 2009/29-imut ilanngussaḡ:

**Inatsisartut inatsisaannik nr. 9 31. oktober 1996-imeersoḡ kingusinnerusukkullu allannguutitalik Inatsisartunut qinersinernermi allanngortitsinissamik Naalakkersuisunut suliaassanngortikkumallugu Inatsisartut aaliangiiffigisassaattut siunnersuut, UKA2010 qaangertinnagu Kalaallit Nunaanni Inatsisartut ilaasortaasa 25-inngortinneqarnissaannut.**

Kisitsisit tullinnguuttut Inatsiartut allaffeqarfianninngaanniit pissarsiaapput:  
Inatsisartunut ilaasortanut aningaasartuutit:

- Akissarsiat utoqqalinersiutissallu 17,7 mio kr.
- Angalanerit, unnuinerit, ullormut aningaasarsiat allallu. 630.000,-  
+ 1.400.000,-  
+ 550.000
- Partiinut tapiissutit 5,5 mio kr.

Kisitsisit naatsorsulaaraanni aningaasat 17,7 mio krooniupput/31 (ilaasortat) = 570.967,- kr. ilaasortanut ataatsimut.

Ilaasortat 25-inut appartinneqaraluarpata 3.425.802,- kr. akissarsianut utoqqalinersiutissanullu sipaarneqassagaluarput.

Angalanermut aningaasartuutit katillugit 2.580.000,- krooniupput.

Tamanna 499.350,- krooninik sipaarfiussagaluarpoḡ, ilaasortat 25-inut sipaarneqartuuppata.

Partiimut tapiissutinut tunngatillugu maluginiartariaqarpoḡ partiimut ataatsimut ukiumut tapiissutaasartoḡ 300.000,- krooniummat, Inatsisartunullu ilaasortaatitamut ataatsimut tapiissut 125.000,- krooniulluni.

Ilaasortanik 25-inngorlugit ikilisitsineq taamallilluni ukiumut 750.000,- krooninik Inatsisartunut ilaasortanut tapiissutaasartunut sipaarfiusinnaavoḡ.

Tassa akunnaallisarlugu ukiumut 5 millioner kroonit missaannik sipaarneqarsinnaavoḡ.

Erseqqissaatigissavarali kisitsisit atorneqartut nangaanartortaqarsinnaammata.